



山海關誌卷之九

藝文誌

夫文者載道之器六經而外代有作者山海雖僻處一隅而名公鉅筆先達鴻篇實不勝紀文取其有關於經濟詩取其切近景物者各登數十首以覘全豹之一斑云誌藝文

記

顯功廟記

商輅

中山武寧王蚤以雄材大畧首從太祖高皇帝舉義平定天下混一海宇已而率師漠北收其餘民北還



留鎮於燕慎固封守為長治久安計以平灤渝關土地曠衍無險可據去東八十里得古遷安鎮其地大山北峙巨海南浸高嶺東環石河西繞形勢險要誠天造地設遂築城移關置衛守之更名曰山海關內外截然隱然一重鎮也自山海以西若喜峯若古北大關小隘無慮數百葺壘築塞既壯且固所以屏蔽東北衛安軍民厥功甚偉景泰甲戌今左都御史李賓奉命巡撫衛人蕭汝得等合詞告言昔中山武寧王鎮此城池關隘皆其創建邊陲寧謐殆將百餘年矣願立廟祀以報王功為請諸朝許之屬歲屢歉事

未克就成化辛卯李進握院章追惟前詔因謀諸總戎募義斂財卜日藏事廼即山海衛治之西建王正殿三間翼以兩廡樹以重門繚以周垣興造伊始適巡撫左僉都御史張綱下車銳意倡率時鎮守太監龔榮總兵右都督馮宗及叅將劉輔李銘悉以俸貲來助用底完美寔癸巳春三月也綱告成於上賜額顯功仍降祝詞命有司春秋致祭歲以為常山海軍民聞命懽呼踴躍稱快有以見王之功德及於人者深且遠矣李以事之始末屬守關兵部主事尚綱述狀徵予以記謹按祭法有云能捍大患則祀之若王

之設險守國使百年之間敵國莫能窺其隙室家得以奠其居其功不亦大乎祠而祀之豈不宜哉雖然王為開國元勳當時南取吳越北定中原東平齊魯西入關陝王之功居多獨山海之人思慕之深者蓋王鎮撫燕薊十有餘年豐功盛烈宜非他處比廟祀聿嚴有以也夫王姓徐氏諱達鳳陽人累官太傅中書右丞相進爵魏國公追封中山王謚武寧其履歷備載國史茲不重著惟述立廟之意俾刻之堅珉庶來者有考焉謹記

山海衛儒學記

李東陽

國朝建學之始惟府州縣有之越自正統改元之詔諸戎衛始得置學而山海衛學實為建焉然廟地湫隘且規制弗稱十有四年都指揮王侯整鎮山海始與衛學教授張恭建廟宇為象設構明倫堂五間東西齋各三間餘尚未備也天順六年指揮劉侯剛復構東西廡十間學舍六間成化七年兵部主事睢陽尚君綱來守山海建櫺星門及製祭器若干厥後餘姚胡君贊別築殿址遂昌吳君志餘干蘇君章繼作棟宇為戟門於櫺星門之內進賢熊君祿重脩學堂外為周垣為泮池池上為橋今尚君弟縉復以主事

來守乃脩齋舍築官廨闢射圃規制悉備與所謂府
州縣學者相埒蓋始於甲午之夏告成於丙午之春
歷十有二年而後備可謂難矣教授周達訓導曹選
謂歲月不可無紀嘗屬兵科給事中蕭君顯前監察
御史鄭君已請予記比訓導君率諸生李琛及給事
君子鳴鳳復具書以請於予予惟唐虞以降治天下
者大抵以武功戡禍亂以文治致太平故草昧之世
不遑他務及其久也化甲冑為干羽變韜略為經籍
故漢之學校至武帝始為之宋初雖有國學而仁宗
之世州縣學始徧天下其功效次第有不得不然者

也先皇帝纘祖宗成業偃武事敷文德休養生息置
天下於衣冠禮樂之域故雖戎官武士亦為之置官
建學使出科貢與文士為伍當是時小大臣庶奔走
祇奉之不暇暨乎復辟之歲乃復有繼而興者今聖
天子在上紹志述功日弘月著出使者宣德意之休
居守者協寅恭之効故雖關徼遠地擁衿佩而橫詩
書者與輦轂之下畿輔之內殆無以異也孔子謂善
人為邦百年可以勝殘去殺魯兩生亦云禮樂百年
而後興况聖人過化存神之妙宜有朝令而夕布者
而又積之以百有餘年之久哉故觀學校者當以時

論不當以人地論也且古之胄子固未嘗分文武為二途今文士習科舉而仕者亦與兵事武胄雖專廕襲然亦有由科目以起者名雖判而實亦相通也况彝倫風俗天下所同無彼此之間則所以學為忠與孝者其容以二乎哉山海舊學固有取科目著名節者不止乎甲冑弓矢之雄後之學於斯者其亦知所勉矣蓋國家之文教於是乎成而有司之政於是乎始故特為書之俾觀者有感焉

重脩儒學記

唐 臯

山海隸京師為瀕海際邊之地連引長城控制遼左

蓋東北重鎮也故設重關以限內外列戎衛以嚴捍禦其所任者將領所臨者卒伍所閑習者戎武之備黌序初未有設也正統間奉明詔始建廟學於城之西北隅聚武胄之子弟游肄其中不數年間蜚英揚輝掇科目賓貢途代相望也顧營建之始規制未備久而圯圮而葺者屢矣皇上起自潛藩入繼鴻緒是歲冬予同年黃君德和以夏官主事來董關守躬謁廟學諦瞻庭宇制之自昔頽者弗振缺者弗完也慨然曰是烏足以振士風弘化理乎乃謀經費量工銳意脩葺殿廡堂齋櫺星戟門以次具舉復移泮池於

櫺星門之內而甃石橋其上別創神庫以虔祭器神
厨以潔庖宰習肄有室都養有饋昔所無者咸加備
焉其材用則撤淫祠之在境內者而充之規費則皆
行旅之冒禁而薄其罪者所樂輸以佐巨役者也已
訖工學之諸生張伯鎮詹榮等偕萬進士義謁予請
記始予奉使朝鮮竣事還弭節山海嘗偕君請學目
觀敝陋為之興嘆乃今獲聞增新其舊豈無忤然於
心乎願謏劣無能為役竊惟祖宗以武功定天下而
興道敷治必先文教士之養於學宮而取諸科目者
類以明體適用為學通經博古為賢經非孔孟程朱

之說例擯弗用蓋以孔孟推明帝王之道歷萬世而
無弊程朱折衷儒先之論俟百聖而不惑故學者能
究程朱之旨可以探孔孟之心能探孔孟之心可以
語帝王之治我朝百五六十餘年治平之效卓然與
唐虞三代比隆用是故也程朱之教人內外本末之
論知行先後輕重之訓蓋深有意於學者故不求諸
內而以文為主不求諸本而徒以考詳略採異同為
務者是誠無益於德而君子弗之學也且入德有序
以知為先成德有等以行為重故足必資目以有見
而足之不履雖見無所用之二者不可偏廢乃可以

入德而造成功之地矣故學者篤信程朱之說而加
之沉潜玩索之功允蹈實踐之力内外交修知行並
進則固不惑於異說之入流於曲學之規以之治心
以之修身以之事主以之澤民無所施而不得矣非
益之大者乎然近時學士大夫或小程朱之說離而
去之至欲奪其壁而樹之幟徐而考之高論有餘而
直内之功不足富貴為累而道德之念何存其於學
者非徒無益而又害之則固不若主敬以固聚德之
基定志以端趨途之始可以要成功而資實用矣黃
君務宣德意而新是學所以期望諸生之意將不在
是乎新學未幾萬君以穎脫舉進士諸生其有繼踵
而奮起者矣於是乎書

附張公時顯
修學記一段

士君子誠於古所稱三不朽者毅然自期偉然自
監久之充積盛而發用先得時德施斯晉功業被
於蒼生不得時著書立言足以信今而傳後是之
謂先自建而以之建學匪靡文是之謂先自修而
以之修學匪飾具於宮墻俎豆不庶有休耶倘不
然譚鄒魯而行則違跡步趨而心則遠甚至托興
學美名以自掩覆如是雖脩極輪奐而伯夷之室
必耻築非其類以尼父之廟貌乃樂藉手於若人
乎顯用是滋懼矣

鄉賢祠記

陳 綰

山海舊無祠立祠以祀賢自海鈞蕭先生始繼此而

祀者有克脩鄭先生角山詹先生祀止三先生故曰三先生祠云夫三先生名在海內忠在朝廷績在治所彰彰著矣顧獨於山海祀之何哉蓋山海三先生之梓里也生斯長斯沒而魂鬼遊於斯則固宜俎豆於斯禮不忘其本三先生之祀於斯也重所本也禮也且夫賢才之生豈偶然哉彼太行之麓蜿蜒東注橫亘塞垣至山海則峭壁洪濤聳滙南北東若甕牖其秀爽靈淑之氣無所輸洩宜必產而為瑰偉卓特之士而三先生者寔出其間故即山海以祀三先生昭地產也不然將不謂秦無人哉關令陳綰曰詩云

高山仰止景行行止余始至山海詢父老訪故實即知有三先生及考其行事與其言論風旨未嘗不為之降心焉三先生之言行已詳於志乘今姑舉其大者夫海鈞公振絕學於邊徼一旦釋屩而處諫垣不可謂不遇矣使能毀方以徇時俗其崇要可立致乃獨彈駁無所避忌卒至流落黔中者數年稍遷至閩臬即抗疏東歸雖戚畹有力者欲為之援公亦不暇顧獨與海內諸名公交往來篇什以泄其豪宕不羈之氣故人稱蕭先生曰賢鄭御史以骸介之資疾惡如讐甫入道即指摘天官闕失巡按陝中復侃侃論

當世事卒懼諛構謫戍獨石幾於不免語云木直者
伐羽竒者鍛然不如是不足以見克修公之賢矣昔
大同軍士之變殺總兵官李瑾外阻中訏計無所出
角山公以卽中督餉獨激於義乃與遊擊戴廉等嚼
血盟因密通總制陰令穴城斬為內應以擒首惡不
成則以闔門報嗚呼斯志也雖以質鬼神可也此鄉
黨自好者不為而公為之豈不偉然賢丈夫哉論者
曰海釣公勇退完名皦然不滓有蘧伯玉之操克修
公抗言亮節之死靡悔有史魚之直角山公奮勇決
謀不避險難有寧武子之愚彼二先生者數竒見絀

遺佚放棄已矣角山公宣勞邊鎮晉位卿貳望重台
揆乃竟沮於壽悲夫使得究其施用其樹立豈如是
已耶然皆有高世之想以名節勛庸自砥礪視得喪
死生若鴻毛非氣雄萬夫志堅百折者不能其超逸
絕塵慷慨激烈之風猶能使頑懦之士興起於後代
斯謂鄉先生沒而可祭於社者非若而人與

學田記

黃景夔

治世養士衰世使士自養士自養其弊三焉上焉者
自食其志無所事養守其道其死不悔然其不遇也
其困也極矣下焉者自食其力徙其業從而之他其

次焉者拙於志而惰於力不能自食資於人以食若
戰國四公子之養士美惡淆而庶耻喪馮驩之歌曰
長鋏歸來乎食無魚可哀也已非國之耻歟三代盛
時其養士尚矣然其詳不可知已後世乃有學田然
不能皆有我朝無學田而有學糧府州縣有差無地
無之者唯衛學則無焉竊意當是時介冑子弟罕學
者衛雖有學僅存空名故不為置糧非法不脩也山
海關東地民久私景夔稽而歸之公仍令業焉而出
其租地四千九百五畝米七十三石五斗七升五合
得諸生經試優等者十二人人月食五斗載於籍以
為恒嗚呼爾士一夫一婦之養此差足矣此地今以
前之士無養然不聞弛業奮而出者有人焉今以後
之士有養矣奮而出如前焉恒也吾不爾異其奮也
倍焉斯異矣然吾願爾士不惟是易曰頤貞吉又曰
聖人養賢以及萬民爾養爾貞吾茲觀爾處爾推爾
及吾將俟爾仕哉

鄉飲田記

詹榮

與川葛子以天子職方氏出鎮山海關踰年為嘉靖
甲午法準弊裁無擾無蓋因次及便宜爰圖修復乃
詢諸士民曰鄉飲為我明盛典著在令甲有司奉行

罔怠以替凡以興行崇化焉爾矧山海畿輔重鎮當首被聲教胡於是獨缺豈國典故靳於衛抑所司者遺之也或對曰鄉飲舉於學我高皇帝建學定制即有之時山海未有學也自正統改元之詔始與建學第初事草鹵他制未遑今人文彬彬然日漸以著獨茲缺典舉之是待我公或對曰用本於財禮脩諸物無能越者有司鄉飲之供取諸歲額斯可常繼吾衛無鄉飲額胡取之即取足目前胡繼之處畫是在我公葛子曰嗟哉嗟哉維茲山海雖稱邊隘猶夫人也乃擯諸恒典之外若無與於化理焉者殆非聖朝同

仁之制夫法無靳於衛徒執往迹無改於循習之弊人自靳之間有識者顧諉諸區區之費而止是愛物而賤禮烏乎可吾天子使臣職得議法責與處分是誠在我乃查近郭閑田籍之官得若干畝歲取佃租若干委官歛貯鄉飲之需取給焉又下令於衛若學俾慎選諸鄉仕而休者必恪乃官歲完名高節無以墨敗者濫其諸鄉民必耆年宿德六行允修無以弗檢者濫主之者則衛視篆指揮也乃正月既望寔為創舉肆筵饗序賓僕畢來始而迎翼如也揚觶有詞凜如也讀法有條肅如也酒食旅獻樂章間作將將

如也雍雍如也既醉而出充然若有所得環橋門以
觀聽者惕然深有所感矣翌日諸士民造詹子所請
曰匪創弗開匪承弗永茲舉也葛公開惠吾人至矣
猶懼弗永也子其記之以告承者詹子曰衛以即戎
知方是急學業俎豆養老所先故衛弗學厥方斯昧
學非鄉飲厥業斯荒施之政教皆苟焉耳山海自國
初有衛歷數十年始學又歷數十年始鄉飲國朝作
人畢化之制至是大備吾人果能務忠孝之實興仁
讓之風以資親上死長之效適觀治隆俗美之成庶
幾無負長人者之意若曰惟永是圖則法罔或限而
用復弗寤葛子亦既有言承之者將無所諉也冀懼
其不永

天妃廟記

祁順

天地間海為最鉅海之神天妃為最靈凡薄海之邦
無不祀天妃者由能驅變怪息風濤有大功於人也
山海去城南十里許為薄海汪洋萬頃不見涯涘海
旁舊有天妃祠相傳謂國初時海運之人有遭急變
而賴神以濟者因建祠以答神貺歷歲滋久故址為
浪衝擊幾不可支而堂宇隘陋亦漸頽毀天順癸未
太監裴公璫以王事駐節山海諭神之靈就謁祠下

顧瞻咨嗟語守臣及其屬曰天妃顯應功利聞天下而廟貌若茲非所以崇明祀也盍撤其舊而新是圖遂施白金三十兩以倡於衆時鎮關兵部主事楊君瑠暨叅將吳侯得各捐貲為助而凡好義者亦皆致財効力以後為媿於是市材僦工擇時興役崇舊基而加廣焉為祠前後各三間堅緻華敞足歷永久其像惟天妃因舊以加整飭餘則皆新塑者復繪衆神於壁間威儀鎗鎗森列左右遠近來觀莫不肅然起敬以為前所未有也肇工於甲申年秋七月落成於是年冬十月衆以麗牲之石未有刻辭徵予紀其始

末用傳諸後夫能禦大災能捍大患以安生人者徵諸祭法於祠為稱我國家明制度尊祠祀豈無意哉亦為生民計耳嘗聞東南人航海中者咸寄命於天妃或遇風濤險惡變怪將覆舟即疾呼求救見桅檣上火光燦然舟立定是其捍患禦災功罕與比故在人尤加敬事而天妃名號居百神之上亦莫與京焉渤海之廣無遠不通神之流行無往不在人賴神以安神依人而立然則斯祠之建庸可後乎當祠成之歲居其旁者厄於回祿勢焰赫然及祠上人遠望之見煙火中人影上下意其為護祠者既而旁居蕩為

灰燼而祠一無所損向所望煙中人影皆無之乃知其神也噫神之顯赫不可掩如此所以惠福予是邦豈淺鮮乎哉順既為叙其事復作迎享送神之詞俾邦人歌以祀云其詞曰蓀壁兮葯房辛夷楣兮蘭檫桂梁雜芬菲兮成堂神之奠兮海旁吉日兮將事女巫紛兮至止蕙殺蒸兮薦芳醴衣采兮傳葩吹參差兮舞婆娑神不來兮柰何輕風颼颼兮水揚波神之來兮容與載雲旗兮駕風馭霆成再拜兮傳神語旋焱不留兮使我心苦神廟食兮無窮神降福兮曷其有終海波恬兮偃蛟龍弭恠雨兮驅暴風災沴弗作兮時和歲豐人有壽考兮無懷痼永世不磨兮神之功

烈女碑記

傅先宅

自孔孟著成仁取義之說學士雅言之然至於所以成所以取即世所稱丈夫者何寥寥也安論婦人女子哉大都生長於禮義之區耳目之所見聞庭幃之所訓誨講之明而守之定彼其慷慨捐軀從容就義者世人尤以為兩間正氣所鍾稱之不容口豈非以仗節死義求之婦人女子難也况求諸邊隅之婦人女子不尤難之難哉以今觀於趙烈女當別論矣烈

女者一片石關戍卒趙來住之女也美姿容性莊重未嘗輕言笑年甫十有六而女紅嫻習過人時有比鄰惡少馬鐸瞰其父母他往謬為借針而謾以淫詞挑之女即歛容罵曰吾父母母偶出若何為者敢窺吾室且若以我為何如人乎揮拳毆之已而其鄰叔聞之具陳所轄提調將鐸稍懲責女自是不勝慚忿欲自盡已又私念曰不面吾母胡以自明次日母回具述之即痛哭不食曰人孰無死遲速等耳兒寧能以皁潔之身冒此褻辱於人世乎已矣母知其志決旦夕守之又三日女佯為解愠者詒其母曰若且往理

煤吾自居此母不慮其遠已也趨而往女即閉門自縊死其鄰婦覺之排闥入已無及矣悲夫余惟趙女者問其地則邊陲問其家則戍卒匪長育名閥匪素諳姆訓其所漸染習聞未知於成仁取義之旨何如而所為若此其勁節剛腸真欲凌霄漢而薄日月視流俗猥鄙之行不啻浼之雖古竹帛所載丹青所圖殆未能軒輊於其間矣藉令女而丈夫顯榮於時其所以植綱常維名教者豈其微哉顧造物者柰何厚其所稟而虐其所遭卒使之抱憤鬱以歿也天乎雖然女不遭惡少身不亡即使幸而稱百歲姬亦志志

山海經言 卷之九
一五
悶悶以老耳然後知天之所以玉成斯女者千百世不死也

重脩漢前將軍關壯繆公祠記 孫承宗

蓋公之論丹誠也曰天有日人有心夫日在天人人皆仰而終古常新天下各據所見以為嚮慕而日不知故冬以為愛夏以為畏畏愛生於人心而日在天不親於愛不尊於畏公之靈感在天下每當狂恣橫暴之暴輒見夫龍旗火馬掀髯而逸群絕倫者公也則畏及困阨蹙迫水火盜賊之變呼天呼父母不可得而解者公若為手提煩惱以列之清涼則又愛至

習於所畏所愛則禍乞為之免福乞為之予而且愛且畏凡今之細民不習孔氏而大人不佞佛然罔不畏愛公如其習孔氏而佞佛者殆如日然天下各據其心所願以享之自有生民以來未有盛於公也昭烈提三尺於漢末公與邂逅定王霸大畧譎強如孟德議遷都以避險傑如仲謀願結昏媾公為詈斥不胥公識畧自足千古史記公於武侯頗有小間又羞與黃漢升同列何也陳壽於蜀志多涉微辭或不無少誣予謂公差有深意非誣也昭烈奔走狼戾取國於他人人心未定所與如膠漆者惟公及桓侯諸葛

山海關志卷之九
為相固無俟有所喻以明心以山野書生驟冠百僚
謀臣猛將豈可以空言懾服昭烈借公發魚水之言
以曉喻將士當時必自有說漢升猛士耳昭烈收降
推心任之未必不虞其驕驚難制公特示不平以寓
藜藿不採之意史遂據跡以書不然將與相不和將
與相不和漢何國之能為公與昭烈誼同兄弟誓結
死生苟利社稷遑恤其他而悻悻觖望偶語沙中君
臣將相間有遺議哉嗚呼天有日人有心日不變冬
夏心不變險夷公之心如日吾之心如公夫忠而得
福奸而得禍惠吉逆凶各以其心為影嚮無不一一

遊公神威中頃者予與諸大吏將領盟於公之祠曰
試捫此心有初終相戾面背相渝心口相逆知性命
不知忠義知身家不知朝廷者神其殛之今誠與關
人士提此語以反此心能無為予所盟叱者其心之
丹如公即如日又安在龍旗火馬鬚髯如戟翩翩乘
風雲而降止者為公也天啓甲子予閱兵覺華幾殆
陽侯之難或言公降神佑護一時誼傳以其語涉恠
畧為輯祠於寧遠未暇為記茲復蒞關門借二三吏
士力蒸蒸祝神之休隨其心所願以印公心於不窮
此公之所以為盛也祠立於山海衛城西關衢北創

於崇禎庚午判山海沈承源副將軍葉時新等重修
視舊址擴十七八予既取公語為顏其坊曰天日丹
心又嘉諸將吏意為之記

山海石河西義塚記

余一元

嘗讀月令孟春之月掩骼埋胔王政也夫王政行於
上澤及枯骨其利溥矣或有行之於下以仰贊王政
之所不及在上好仁在下好義殆並行而不相悖者
歟山海舊有義塚數處大抵湫隘傾仄歲久丘墓相
疊幾無餘地邇有紳士商民輩彙金作會施棺濟之
積穀備荒酌量多寡為便民事未已也爰就西郊文

殊庵右用價購撫寧縣下地十五畝益以本庵香火
地五畝擴為一大義塚區建坊豎碑奠垂永久因憶
昔甲申王師入關與流寇戰此地以西二三十里
間凡殺數萬餘人暴骨盈野三年收之未盡也值旱
約貧民拾骨一擔給錢數十文骨盡竊取已塋之骸
以繼之覺而遂止彼時但就坑塹或掘地作坎以合
掩之耳然所殺間多脅從及近鄉驅迫供芻糗之民
非盡寇盜也故瘞埋之舉上所不禁况此纍纍者非
羈旅之鬼則貧窶不能辨塋地之櫬孰非並生並育
之儔安忍聽其暴露拋棄而不亟為之所哉蓋普天

山海關志卷之九
之下皆王土也率土之濱皆王民也以王土堊王民
即王政也下之好義要本於上之好仁方今

聖人在上為之下者相與培淳風敦厚道以為祈天永
命之助故為斯舉者事出衆情而命稟當事慎勿視
為愚賤之私惠則庶幾近於道矣惟是在會諸姓名
為不可泯悉鐫碑陰俾後來者有其攷據知所觀感
焉是為記

重修山海火神廟記

陳天植

嘗考之輿圖古未有山海關關之設自故明始東連
遼海西控畿輔屹然稱巨鎮云其間山川之雄濶

人文之蔚秀風俗之淳茂民物之康阜甲乎一郡焉
余承乏斯土六載於茲凡一切宜興宜廢之事亦因
乎民之情而已矣署之東有火神廟鎮之福神也關
城人士事之惟虔歷年深久風雨剝蝕垣牖頽敗簷
楹摧折神像幾委荒荆叢棘中余時展謁神所心焉
悼之欲謀所以鼎新之者念生民凋敝已極瘡痍未
起而復有所營造不幾重煩吾父老乎有志未建會
鄉士大夫有重修之舉以余官斯地且廟與署鄰欲
余為之倡余曰此善果也亦夙願也天下事有宜於
創者有宜於因者創者難於慮始因者易於圖成斯

舉也余亦因之而已曷因乎仍舊也匪惟仍舊亦因乎民之利以利之而已夫神為炎帝之精作鎮東土上為國家開文明之治下為斯民養和寧之福神之為靈固昭昭也邇年以來烽烟無警烈焰不驚問人有天札乎曰無有物有疵厲乎曰無有問歲有不登民有阻饑乎曰無有水旱有失時風雨有愆期乎曰無有乂若茲神之眷爾民者至矣宜民之戴其神者深也民既戴神之德而弗思妥神之靈安乎弗安乎謀所以重修之誠哉善果也余既官斯土敢不徇民之請以成茲盛事乎爰捐爾俸鳩爾工庀爾材計木植幾何磚石幾何陶瓦幾何匠作工費幾何先正殿次大門次前軒再次後殿數月之間次第落成頽者以整故者以新棟宇流丹榱題煥采匪藉衆力曷克臻此因知山川之雄濶人文之蔚秀風俗之淳茂民物之康阜實維神之昭格也斯舉也董厥工者耆老善士也襄厥事者薦紳先生也觀厥成者城守與路衛諸公也典厥香火者學佛子道鐸也步諸君子後珥筆以紀其事者東甌陳天植也

重脩山海衛城隍廟正殿碑記 余一元

夫城隍之神因城而設者也有城因有神所以顯壯

山海關志卷之九
金湯而陰司保障者於是焉在其所係顧不鉅哉山海一城古稱臨渝又稱榆關其後寢廢至明徐中山王創衛立關始名山海蓋因元遷民鎮而建此城也自茲以後遂為畿東重地薊遼咽喉借此一綫以通之本朝盛京在東燕京在西兩都孔道允繫於斯視昔尤為要區矣城創三百餘年屢經兵警從無攻克之虞革命時

據關拒寇接戰石河之西相持竟日夜王師適至直抵西郊一舉而殄滅之此城居然無恙也雖云天命有在事會適然安知非城隍之神有以潛扶而默佑之也哉然神曰城隍

府州縣在在有之前代多加以公侯之號明初一切除去但以本號相稱昭代因之不欲以人世爵秩褻誣神明耳廟久殿宇就圯信官白尚信等糾衆捐貲為聿新計重脩正殿三間抱厦三間巍峩璀璨較曩規倍增壯麗藉以妥神即資以福民洵盛舉也工竣求余一記其蹟余謂凡民有不畏名教猶知畏功令者抑有不畏功令猶知畏神明者神所以綱維名教而輔翼功令者也知畏神明功令名教尚得由此以推致之聖人神道設教豈無謂耶况城隍之神至切且近一方冥庇實式憑之非埒於高遠

幽微之不可知者固知共成斯舉者之不容已也或疑山海籍屬衛城隍之神宜屬衛權固有尊於衛者神之靈不虞有制乎不知神不貴尊而貴專夫惟上帝有專責而神自具有靈爽蒞斯土者果能推誠布公盡人事以感神明立見神功之昭應矣余為是說以記之載取捐修姓氏勒諸碑陰以為向善行之勸云

重修貞女祠記

程觀頤

事莫善於新人之所古而氣嘗足以壽於世所謂氣者舉天下可欣可駭為悲為愉之致不足以撼其輜

毫而挺然獨表吾節義夫是之謂浩然之氣至於沿聞既久歲月已長有能煥其堂奧而更始之使人目新乎其視情新乎其瞻令古人節俠之氣如在近今間所謂與人同其好也孟姜女者產嬴季姓許氏于歸范郎未久而夫就役於長城遂已歿於軍姜女足跡萬里終得夫骸竟枕石於海濱云土人為立祠薦享之南臨巨海北望層巒列楹數間其地高阜傑出下則平沙石漫遊人至其側見夫浪波洶湧潮流激盪之勢若出於履舄之下對夫藁葬蒼鬱巖崖拔出挾光景而薄星辰者若出於衽席之內因以為

榆關麗觀焉噫秦之暴六國不能爭秦之力謀臣猛將不能拒而姜女以一女子致今天鑒貞烈排岸顏城直足奪始皇之氣而抗其威使六國之謀臣猛將皆如此婦人女子之烈亦何自有築怨築愁之事惟婦人女子之烈遠過於六國之謀臣猛將此固秦皇之所不能禁而荆軻子房之所共奇者也積既遠而雨隳潦毀蓋藏漸陳於榛蕪第草之間每風號燕山月苦渝水惜其廟社有跡而即新無人會安宇曹君來居此關因其故址鳩工增庠斬材以構之陶瓦以覆之既成而亢爽卓犖之象煥若日星於是居人皆

喜慰其思而古蹟復燦使夫荒遐僻壤之境至於後人見聞之所不及而傳其名覽其勝者莫不低徊俯仰想姜女之風聲氣烈至於愈遠而彌爛則曹君真可謂與人同其好者也故曰事莫善於新人之所古而氣足以壽於世客有嗜而願予曰此可以記矣遂記之

五聖祠記

穆爾謨

農圃本務也圃亞於農而不與末作等趨天時盡地力肆其功於播種耘溉之間而自食其報故謂之本務也關門於明季為屯兵集旅之區肩相摩踵相接

俱仰給於數千里之飛輓而不恃此山陬海角之田
至蔬菜諸新則需之近郊左右焉 清興邊郵無事
兵散旅稀蔬菜所須無多為圃者變計乃大半以植
藍作靛於是關門之靛甲於他方而他方之貨靛者
往往於關門轉販焉西羅城之西北隅蔬滋美而靛
尤蕃人遂資以為生而室廬比興寢成小聚幾幾乎
有樂土之風是雖其土之沃力之勤而居人咸歸其
功於神爰相西隅數武構 五聖一祠歲時祈禳而
報賽之嗚呼神之功孰謂無據哉蓋龍王布澍則祀
之虫王靖災則祀之福神普利園神監植仙公成靛
則並祀之是諸神皆能明德協休以荅馨香而降和
惠故居人構廟立像祈禳而報賽之非無謂也余於
是歲讀禮守墓過其所居人為述神功以告余余即
援神意以教之曰爾知神之所以福汝者乎盡其力
而趨其時獲其利以行其善孝於而親敬於而長睦
於而隣安於而分神之福汝由於汝輩自貽之神豈
汝私耶居人曰謹奉教不敢數請因而記之於石

重脩澄海樓記

陳天植

史記秦皇帝築長城大發天下丁男起臨洮至遼海
延袤萬有餘里以為長治久安策無踰此詎蒙恬之

役方罷而孺子嬰已啣璧迎沛公嗚呼險亦安足恃哉由漢晉以迄宋元更姓改號不知經歷幾朝然代有脩築故明徐中山王守燕依山阻海規方度勢即元遷民鎮拓而城之建關設衛領千戶所十置官軍萬人屯田其地名曰山海關其亦趙充國屯守金城意乎迨至中葉中外脊脊多事於是重兵宿將風色雲擾關門遂為邊疆要地焉甲申賊破都城橫肆屠戮我

大清

世祖章皇帝爰整六師入關合

兵殲賊於石

河之西乃定鼎燕京期年之間南北渾一六合之內罔不臣服關城為向化首區且其地東通奉天西連畿輔屹然稱中腹重鎮因設章京四大人為城守計用專譏察向來越邊者出入靡禁當事者患之遂謀脩葺邊牆今

上龍飛改元之七年詔下大司農議發內府金錢二萬五千有奇築脩坍塌督撫行令北平觀察使錢公督其事公因檄下山海廳路衛分監厥工予因是與路衛兩君昕夕僕僕於山榛水湄間長城之杪又甃石為壘截入海中高可三丈許長且數倍曰老龍

頭此則故明將軍戚繼光所築濤摧波撼日就傾欹
又城之上有樓三楹為明職方王致中所建亦頽敗
不可登予與兩君監視城工坐其下時有戒心嘗共
嘆曰危哉斯樓不蚤為葺行將化為冷風宕煙矣十
閱月城工告竣會路帥孫君以病去予宗殿揚君以
廷試第三人奉

天子命來鎮是關時時閱武海上每至斯樓慨然有
重脩意過而問之予予曰是役也固予之夙心也矧
又有守土之責乎按舊志形家言關城勢如飛鳳左
右羅城為兩翼樓臺高峙海涯厥象首若就圮顧可

令鳳之首俯而不舉乎因集關之士大夫與子衿耆
老僉為謀咸稱善且曰聚腋成裘聚土成丘斯樓之
脩要非一手足之力皆樂捐金共襄其勝予又與路
衛兩君董厥成焉工始於仲夏落成於仲秋衆因請
予為記予不敢以不文辭因思昔人蘭亭岳陽竹樓
亦各有記以誌景物若斯樓也面臨巨壑背負大山
高枕長城之上波澄萬里嶂疊千重又豈區區彭蠡
洞庭會稽山陰諸勝足媿其雄深哉仍其舊顏曰澄
海繹斯義也海不揚波有聖人出職方題名或以是
歟方今

聖天子臨御萬方東鱣西鯨測水來王烏戈黃皮望
風受隸以名澄海豈虛語哉若夫為翰為屏為鎖為
鑰於以鞏固雄關真安海寓是在
朝廷之得人又不徒恃此長城之固與斯樓之壯也
矣予願後之君子登斯樓也振叔子之輕裘舒庾公
之清嘯當念關之人士修葺艱難捐助美善加意拊
循勤思保障庶不負予勒名而記之意

傳

名宦異泉李先生傳

王世貞

李先生者諱英字文華饒之餘干人也嘗自號異泉
學者尊稱之曰異泉先生先生少好學念邑中鮮有
授禮經者而餘姚多知名士因徒步千里負笈往尋
師數年盡得其學歸而試博士弟子它博士弟子亡
能抗者遂食廩學宮而至省試輒不利先生怡然曰
我能工干祿不能工命歸而勤學如初然竟不利五
十餘始以貢上春官得教授山海衛山海故中山武
寧王達置戍以限遼水為左輔絡其戍卒即冒青衿

而以擊技取大官不甚曉書史先生精心誨之課業之暇相與反覆開諭歸之忠孝禮讓咸彬彬質有其文矣時中貴人瑾用事魚肉薦紳大夫先生聞而嘆曰逢萌何人哉移書臺使者乞骸骨歸臺使者三挽之不得諸生前後追餞數百里外先生示之書一束曰偕我而來偕我而往者此耳因賦詩見志先生歸而道遇寇略先生橐亡所得僅得其衣冠去先生抵家猶裼裘其壻張僕者藩伯吉子也以父衣冠遺之先生却弗御曰吾豈倩他人衣冠者先生性友讓其少時與兄弟分財必居少伯兄病疫蚤暮視之亡間

或謂疫不虞染耶先生曰疫誠染者吾亦不忍使吾兄獨疫也其後里大饑先生謀賑之不獲徧則捐郭外地為義塚收瘞而瘞之於書好誦小學每謂使我終身行之不既又好舉趙閱道夜必告天以查所為事及司馬君實平生未嘗不可對人言二語宗戚子弟有小不善輒諭之曰得無不可告天乎又曰君實不畏人知若乃畏人知何也以是諸宗戚交相戒為不善何以面李先生而其弗便先生者謂先生佞不藏人過顧有盜夜穿窬入家人掩而縛之呼請燭先生曰吾代若守縛若取燭已解縛縱使去徐謂家人

曰民自急贍死耳一燭而得其人即縱之何以自新
其為長者又如此先生澹然一切亡所嗜好子弟即
不布素不敢見也前後邑令謝儀馬津石簡皆清峻
鮮所折節獨樓重先生時時造門請質疑難先生亦
無所報謝邑令每謂先生跡可數非元旦鄉飲我何
能屈先生益壽至八十六無疾而終後先生五年所
而志山海者以先生為名宦其又若干年而志餘干
者舉先生鄉賢○王子曰夫二志者郡邑史其猶行
古之道也夫中山武寧王國元勲無兩也先生以一
儒官廩名而無愧色餘干有胡居仁伯仲吳聘君而
乃舉先生並稱而亡輕辭其猶行古之道也夫

松喬劉公傳

李道成

古者人有徽德懿行綜芳模者必為傳以昭示來
亦猶國有史郡有誌家有譜均之不可已也博士劉
公宦履所到堪法堪傳詎可令其泯泯耶公諱延齡
字景仁松喬其別號也世為關門著姓曾大父而下
並為仕籍聞人公猶岐嶷不凡垂髫時即為伯父罔
卿公器重曰此吾家千里駒也後數年祗見其追風
絕景耳未幾補弟子員旋食餼餼謂科第可坐致而
竟格於數需次貢春官識者惋惜明壬午余謁選入

都門晤公長安客舍見其貌恂恂言琅琅每恣談名
理娓娓令人忘倦不覺心折遂與訂交亡何余以分
訓江南公亦司教任邑蒞任矣從此南北萍分自謂
相逢祇夢寐不意

龍

飛三載余避亂還里適公以新命掌教吾州真奇邁
哉暇中手一編示余曰此劉氏家乘也兄辱愛深曷
知吾宗原委乎余捧讀之見其首列四代像與前人
被命之詞以及士紳貞珉之語因喟然嘆公用意深
而貽謀遠也蓋自啓佑之道不明家乘之修遂鮮此
無論前美弗彰為遺忘厥祖後即有賢胤其何則焉

宜公恫焉憂之彙為此書以貽後來遠者弗論近若
魯大父鴻臚公以文學贊鵷序垂譽朝班大父奉政
公以雋才佐廬州清流肥水伯父罔鄉公乙榜歷官
鄉寺善政格天惠澤濟衆到處勒峴思棠其父耆壽
公韜光未耀渾朴無欺乃其高義拔俗既孝且友允
足為鄉閭表帥公承四父之後奮然以克振家聲為
已任淑行莫可縷觀其大者請伯父罔鄉公崇祀鄉
賢殫厥心力垂三十年一旦修舉暨勸其父任伯兄
給產就約讓豐以安義命中外稱其孝友及捐腴田
以修羅城迄今猶輸國課公爾忘私屢為直指使嘉

賞春風化雨薰被良多比年摩青霄而翔雲路者槩
出其門以至廣應試入泮之額讓需次遞及之貢尤
人所難追分教任邑未匝月而值大兵壓境衆相視
無人色公慨然以兵事自任戒飭警備宿雉堞上者
累月徃大兵攻城俟丙夜鷄初鳴而發公知其然預
令城中盡殲鳴鷄傳一鼓以達旦由是兵不得逞孰
謂儒生不嫻軍旅哉事平檄書上臺蒙恩紀錄至於
歲試舉優遺劣寧忤督學使而不恤此又心綦仁而
意綦虐矣及其掌教吾州也自其淡泊遑遑卻寒士
之餽時陳一得間或佐有司之籌凡有製作無不資

公手片言隻字人人寶若南珠此其才尤有大過人
者矣目今受知當路屬騰薦剡然則公之底鑒未可
量也公一子諱允元博學能文蜚聲黌序有父風

朱鄧林先生小傳

李集鳳

先生姓朱諱國梓字子壽號鄧林別號葵誠子遼東
前屯衛人也父諱梅以總戎屢建奇勲先生其仲子
也少穎異負經濟才以明經入仕籍累官至永平兵
備道所在有治聲甲申流寇陷京師時先生任永平
誓以死母夫人諸氏曰死固其分顧吾年幾七旬汝
死吾亦不能獨生母子徒死無益也汝盍隱忍以終

吾年且因觀變而為復讐計乎先生於是奉母歸山
海毀冠祝髮廬先塋之側而獨處焉未幾

倡

義拒寇先生乃率家騎入關左右

而共圖之

清興亂既平奉母居石門當事者屢薦於朝陳情固
不就日以湯藥侍慈闈故其詩曰國喪君何在家危
母更劬輸忠應致命顧孝暫留軀大義不容髮雄心
獨惜鬚深山慈侍下適軸隱柴愚觀此而先生之志
可知矣越十七載母夫人以壽終居喪合禮哀毀骨
立幾不欲生允矣忠孝性成者歟先生無疾言無遽
色無情容從之遊者如坐春風至其朗識沉謀委折

周至不能測其涯涘也先生善書筆法適媚匠心入
古或鳴琴於明月之下或垂綸於流水之間蕭蕭茅
屋雖每絕糧晏如也蓋其德宇深純養之者厚而清
風高節真足以立懦廉頑易曰鴻漸於逵其羽可用
為儀吉先生之謂矣

關門三老傳

余一元

古人以長年為瑞商周二老尚矣如唐之香山九老
宋之洛浦十三老當時侈為盛事後代播為美談允
足膾炙人口而傳徽蹟於不朽已關門前輩固多名
賢迄今享耆德而膺眉壽者得三人焉藥公諱東龍

字雲從官至平陽郡丞見壽九旬有二呂公諱鳴章
字太呂號夔一別號耐軒官至隴右少叅見壽八旬
有五穆公諱齊英字羽宸官至商城少府以子貴封
膳部正郎見壽七旬有三皆康強無異少年人樂公
榆關舊家其為弟子員時即見重於當事有事輒咨
詢之起家明經司訓靈壽改補雄縣隨在教法嚴整
堪為模範遷府谷令值兵亂路阻歸未幾起補壽張
有治聲已擢平陽貳府以前任忤當道解任爾時年
踰七旬矣抵家教子撫孫儉素自守不干預外事子
正馥見今歷仕畿南廣文孫三人皆遊庠公壽耄耄

耳聰目明齒無缺行健步非所謂地行仙者耶呂公
世襲萬戶侯至公讓爵於弟以遵父命讓產於弟以
順母心廢不予子而予姪又為亡姪立嗣無非從孝
友起見也幼攻儒業棘闈再遇未獲售以選元授許
州倅當事重其材俾專撫寇之任深入寇壘能不辱
命比旋值降寇叛焚劫倉庫擄掠婦女公躬率家丁
巷戰斬級驅衆遁去保全闔城百姓咸尸祝之尋遷
京秩以母喪歸時當多事撫道就商方畧一日有悍
卒謀不軌道標鄉兵烏合輩侈言抵敵聽者信之公
乘夜亟入幕止曰此屬風號精兵制以力必不勝則

山海經 卷之九
禍及圍城矣不若同鎮帥召其首領與議事故延至
且設法撫馭可無虞也道鎮從之於是得消未形之
患凡所叅謀議類此革命時
興義旅

推公糾紳衿率鄉勇措糗糒石河之戰公單騎入陣
督民餉士詰旦迎 王駕於歡喜嶺戮力殲寇錄功
補戶曹即與修賦役全書權隴西道駐鳳翔亂離之
後民竄山谷城市一空公多方招徠俾復業民賴以
安忽忤過客致還里未究厥用相國党公重惜之不
能挽也歸林下二十餘年問耕讀捐金贖所知女撫
若已出為擇名門嫁之子燥如宰黃陂卒於旅有孫

世壇遊榆庠克績祖緇公雖世宦清素無異布衣暇
則吟咏倡和無倦色天之所賦洵有大過乎人者矣
穆公吾鄉望族也先世久積德詩禮綿綿至公有義
方教三子皆偉器長爾謨成進士以部郎擢守萊郡
次爾誥遊京武庠季爾訓登武鄉榜諸孫濟濟或遊
鄉學或躋成均同族姪若孫輩文武科第及明經入
仕途者十餘人諸生輩復數十人永郡族黨之盛無
復出公右者矣公少入黌宮錄功授司訓陞商城貳
尹未任遇 覃恩封奉政大夫貴而能謙啟義讓重
然諾兩遊子任晚安故鄉恂如也年踰古稀矍鑠復

舉一子壽與福詎可量哉詩云三壽作朋如同如履
其為三老咏歟

文

告石河文

范志完

榆關之西有水名石河者從義院等口而入盤旋於
澗谷之間奔騰於巉巖之內砂磧流瀉四時不涸秋
夏更覺泛溢欲為橋梁則易於漂潰欲駕舟楫則梗
阻膠滯不能通行人徃徃褰裳拽騎偶至中流少一
失足遂淹逝莫救土人云歲以為常莫可誰何余聞
而嘆曰噫嘻夫水以衛國濟民滋稼通旅為關河形
勝未聞作生民陷阱一至於此昔昌黎公之治潮也
鱷魚避之六十里西門豹之治鄴也河伯遂不敢娶

山陰縣志 卷之九
婦完才雖不能望二公豈石河之靈不及鱷魚與河伯也耶自告之後安瀾異於昔日是石河之靈也每歲春秋當遣官祭之如其不悛是石河之頑且殘也完忝為天子命吏豈肯便頑殘之孽為斯民害予將合班軍之力塞築邊口使石河從遠方而來者還歸之外地堂堂上國安用此一綫惡瀆哉石河其聽諸勿悔

范公在關三年河不為災

告神驅虎文

余一元

生民野獸之各安其處也從古已然關門北山南海前此居人樵採山谷間併無野獸之擾邇來頻遭

害今歲尤甚當此天下一統

新上御極百靈效順之時豈可容此殘暴之畜數數戕人乃爾耶竊聞獸得食稟命於神似此殘惡荼毒神不知何以為神知之而故縱之神之所職果何在也况此皆

天子百姓也豈供野獸俎上之肉也糾衆合詞特具牲醴仰叩明神懇祈彰神之靈鼓神之威疾驅害民之獸於遠方以安我生人俾後此不復罹其毒或非神所轄之地亦當轉告互驅務致各安其所未佩神庥於不朽

詩

塞上曲送王元美

李攀龍

燕山寒影落高秋
北折榆關大海流
馬上白雲隨漢使
不知何處不堪愁

鎮東樓

龔用卿

齊雲結飛閣
跨嶺限虹橋
積水平河漢
憑欄望海潮
蛟龍從變化
鵬鷲任扶搖
欲借凌風翼
翱翔上九霄

前題

陳綰

樓閣晴陰向晚開
海天秋思獨徘徊
寒生絕塞砧聲急
木落荒郊鴈影來
關樹不迷南國望
羽書頻見朔

風催感時忽訝潘郎鬢作賦還憐王粲才

前題

楊 琚

高樓百尺枕城頭午夜裁詩月滿樓四座彩輝明似
晝一簾香霧冷於秋解圍猶說劉琨嘯乘興應追庾
亮遊徙倚欄杆正懷古金波遙映海東流

前題

尚 綱

十二危欄百尺長倚天傑構鎮邊疆海山南北環千
里城郭高低匝四旁入座雲籠村樹渺隔簾風遞野
花香太平時節登臨好暴客重門不用防

前題

尚 縉

試倚危樓趁午涼清風真可傲羲皇百川逝水歸滄
海萬里浮雲閣太行自含笑談揮塵尾肯將岐路泣
羊腸飲餘欲奏南薰調鼓角頻催暮鑰忙

前題

蕭 顯

城上危樓控朔庭百蠻朝貢往來經八窓虛敞堪延
月重檻高寒可摘星風鼓怒濤驚海恠雷轟幽谷泣
山靈幾迴浩嘯掀髯坐羗遂一聲天外聽

前題

鄭 巳

關橫山海東藩壯樓逼星河北極高陰雨晴雲朝暮
變吟風弄月古今豪荒遐俯控來重譯羽檄希傳謝

六韜何處籌邊誇第一清朝鎖鑰屬兵曹

前題

戚繼光

樓前風物隔遼西日暮平闌望欲迷禹貢萬年歸紫
極秦城千里靜雕題蓬瀛只在滄波外宮殿遙瞻北
斗齊為問青牛能復度願從仙吏換刀圭

前題

陳名遠

百尺鎮東樓遙臨瀚海秋怒濤吞樂浪大漠接營州
月冷閨人夢風高戍士愁獨憐章句友空復羨封侯

角山寺

黃景夔

愛爾棲霞勝乘秋來寺中山高天氣肅蕭瑟多淒
崕枯驚落葉露重濕草藪感此四時序代謝何匆匆
君看盈虛理退者在成功智哉張留侯千載名無窮
棲霞復棲霞無以官為家

又

古寺亂峯裏嵐光四映碧出城指郊路游賞恣所適
俗吏苦紛拏久抱山水癖躋高力未倦愜願如有獲
遠躡想幽人安得卜一宅徑曲便通樵厥長柔可摘
白晝鳴林禽寒甃汲泉脉藤蘿縈崖樹鼉鼉掛石壁
信步陟絕巘去天不盈尺頽洞覩海氛光景相薄射
曠哉此時懷迥與塵世隔長風吹襟袖清嘯萬里客

前題

馬 駁

人生常懷憂流光祗虛過
逍遙對珠林忘形依石坐
鳥馱煙霞還猿穿藤蘿破
雨霽覺景幽衣冷耽雲卧
不求東海仙近訪西山餓

又

夙抱煙霞癖無緣脫鞅掌
百慮蕩內機群囂勞外像
忽忽青陽暮遙憶山林賞
薄言尋蹊壑所希絕塵網
佳氣紛鬱葱寶地開虛敞
泉聲清且幽物色何駘蕩
莓苔染堦碧松露滴石響
舉觴臨東風悠然任來往
長歌故徘徊古洞恣偃仰
歸來憇空堂樹杪月初上

前題

劉 隅

紫塞雙峯接丹梯萬仞緣
菟搖山入海目斷水涵天
白石留仙篆青松覆綺筵
不辭今日醉潦倒媿高賢

前題

聞人詮

緩險真成癖探竒思不禁
禪房高士枕雞黍故人心
去國應千里行囊只一琴
杖藜僧舍近鐘磬有餘音

前題

劉 崙

雲鎖空林寺盤旋石磴長
細泉清滴滴深樹藹蒼蒼
海氣侵禪幄巖陰落酒觴
歸來煙市晚猶覺兩花香

又

絕巘藤蘿迥涼生五月秋野心同海鶴塵夢愧沙鷗
遠塞陰重蕪平城霧薄收神京何處是縹渺五雲頭

前題

陳 綰

每日城中見角山入山始覺遠人寰香雲細裊龍宮
靜石蘚斜侵鳥道班殿閣影從滄海落梵鐘聲度碧
空還關門吏隱渾無事猶羨僧齋盡日閑

前題

白 瑜

山靈招隱已多年穿石板藤肯讓先謾說太行窮地
盡驚看溟海與天連低回眼界塵凡外咲傲身疑牛
斗邊不是息寬容選勝當關猶稅買山錢

前題

梁夢龍

魯緣國計訪蓬萊勞擾還從碣石回東北兩觀滄海
日幽青一覽角山臺遐荒玉帛風雲護聖代金湯天
地開手握丸泥封要害武寧經畧亦雄哉

前題

陳天植

振策最高處危峰接大荒雲歸遼海白沙湧薊門黃
野草匝初地秋風冷戰場不堪重甲古把酒酹斜陽

前題

張瑞揚

金碧何年降法猊翠微遙映海雲低旛飛龍鳳虹雙
引燈掛琉璃水一携東揖蓬瀛還珮玦西瞻衮冕拜

輪蹄山頭向晚籠歸轡萬里長邊襟帶齊

角山精舍次呂岍野韻

唐榮

百二泥封鎮日閒肩輿乘興到空山蕭疎野徑蒙携
酒風雪柴門為啓關絕調豈云齊唱和高情勞憶舊
追扳留君坐對寒宵月暮柝頻催未許還

園春山

洪鐘

翠擁螺攢四面高淡烟疏雨景偏饒始憐徑路稀車
馬便覺林泉隔市朝薜荔香邀麋鹿狎笙簧聲度燕
鶯嬌尋常詩酒皆堪樂莫恠淵明懶折腰

觀海亭

李學詩

迢遞關東道留連海上亭片雲迴島嶼孤鶴下山城
浪漫濠梁意風流斗酒情浩歌看落日塵世一浮萍

又

覽勝同驄馬停杯看午潮天空水色合風定浪花消
日月雙丸轉乾坤一葉搖桑田今幾變感慨意蕭蕭

前題

朱之蕃

秦城萬里俯遐荒覽勝都忘在異鄉坐待潮生宜日
永還從海濶信天長塞鴻斜度飛禽寂珍錯旋添牡
礪香賓主不須辭盡醉詠歸堪繼舞雩狂

前題

葛守禮

亭畔邀嘉客凌虛興復清游魚分小隊野鶴導先旌
雲出山含雨潮來水漑城且開滄海竿何處覓長生
前題
蔡可賢
城頭望海海潮生白浪乘風撼塞城漢使不來槎自
轉秦皇已去石還驚桑田反覆千年事雲水蒼茫萬
里情此日流觴湏盡興當時採藥竟何成

前題

黃洪憲

茫茫沙磧古幽州日落烏啼滿戍樓萬雉倒垂青海
月雙龍高映白榆秋虎符千里無傳箭魚鑰重關有
扞柝誰道外寧多內治衣袵應軫廟堂憂

前題

戚繼光

曾經澤國鯨鯢息更倚邊城氛祲消春入漢關三月
雨風吹秦島五更潮但從使者傳封事莫向將軍問
賜貂故里滄茫看不極松楸何處夢蒐遙

前題

張時顯

滄溟極目水連雲秋色遙看已半分潮擁高城浮蜃
氣劍橫絕塞閃龍文晚風落日何王島夜月飛濤此
女墳萬里靈槎無計借乘閒且自狎鷗群

圍春莊雜感

蕭顯

三十年來走宦途乞歸白髮半頭顱依山結屋塵偏

靜臨水觀魚興不孤
野老騎驅尋橡實
林僧談笑斷
松腴離家復作還家夢
一夜團藥骨肉俱

又

買斷山莊景最奇也
堪臨水靜垂絲
畏途自慶歸來
蚤安枕何妨睡起遲
適興聊沽陶令酒
感懷頻咏杜陵詩
插頭拄杖堂前坐
繞膝兒孫嬉戲時

山城新修中心樓

馮時泰

城心又起一高樓
畿左雄關益壯猷
鼓角日鳴寒葉落
鐘聲風靜海波收
遼陽車馬堅王會
薊北山河拱帝洲
閒上凌層西向望
五雲深處瑞光浮

石河

尚網

奔流一派北山隈
亂石交衝怒若雷
騰有湍瀾從海去
更無舟楫渡人來
窺魚鷺向沙邊立
送客騎於岸上回
最是秋來偏泛漲
應憐弱水隔蓬萊

姜女墳

陳綰

妾身本在深閨裏
十五嫁夫作胥靡
赭衣就役築長城
聞在遼東今已死
妾身本為從夫來
夫死妾身朝露耳
間關萬里竟何歸
只合將身葬水渙
孱軀雖死心未灰
化作望夫石
壘壘江枯海竭
眼猶青望入九原何日起

前題

張瑞掄

長城不為祖龍存千載誰招姜女魂海底有天還正
氣潮頭無日起沉寃月明華表三更鶴風吹天涯五
夜猿應是當年飛血淚春來塚上化苔痕

又

烟雲無際水茫茫姜塚巋然峙海洋環珮久經眠渤
澥夢魂幾度見滄桑風掀鼉鼓催潮速月照鮫梭織
淚長嗚咽濤聲思舊怨墳前夜夜訴秦皇

秦皇島

陳綰

聞說秦皇海上遊至今絕島有名留不知遼海城邊

路多少秦人骨未收

前題

張瑞掄

秦島荒涼石磴閒千年遺跡海雲間清風皓月天長
久渚雁沙鷗日往還自謂有功過五帝誰憐無計到
三山殘碑斷碣仆波底蚪蚪文封璫瑁斑

出大古路口燒荒

范志完

九月莎枯鴻鴈鳴將軍躍馬出長城旌旗光閃風雲
變鉦鼓聲催鳥雀驚烟霧橫鬪驅虎豹火光燭海吼
鼉鯨赭山不數秦皇事焚澤應推伯益名

閣黎洞

劉廷宣

愛僻尋閒得不閒更穿雲窟學猿攀談傾白馬公孫
社氣散青牛尹子關老樹笙篁雜霰雨石泉環珮澹
潺湲酒闌客倦魚歌歇醉倚嶽岑未忍還

春日渡榆關聞遠鐘并聞海潮 范志完

榆關西去渡危橋溪水涓涓月半霄彈指三生俱
幻鐘聲遙帶五更潮

望聯峯山

程鵬

不踏聯峯麓匆匆二十年山靈猶識否蘭若自依然
勿假移文却終當辟穀還多情林外鶴來往故翩翩

雲峯寺

劉廷宣

梵聲響落最高峯一駕茅龍萬壑鐘春色奚囊收不
盡劍花昨夜吐芙蓉

讀史弔詹角山司馬

葉向高

司馬高名霄漢間乞身一疏動龍顏兵戈已息雲中
警劔履仍辭闕下班心似歸鴻依鴈塞功如車騎勒
燕山九天雨露何時灑冷落松楸傍漢關

魁星樓成勉諸生

李本緯

魁躔豈亦好樓居壯爾仙才射斗墟檻落彩雲飛翰
墨牕含奎宿映圖書篝燈夜夜燒藜杖荷橐人人佩
玉魚咫尺星門森武庫也知文戰預犀渠

又

我撲聯翩化兩年澤宮濟濟奮多賢蠹魚不老儒生
志螢火偏成幼婦篇九萬扶搖騫遠到三千獻納吐
真詮由來禹惜珍分景莫放流波白日延

石門道上

范志完

四月邊城始覺春依依楊柳映青蘋石橋隔岸遙相
望犬吠花村門倚人

山海關

陳天植

雄關劃内外地險扼長安大海波光濶遙峰殺氣寒
疆場百戰後煙火幾家殘寒草連天碧行人不忍行

靖邊亭

呂 廣

高亭新構遠塵寰俯瞰蒼溟座倚山松壑雷應堪抱
卷鯨濤拍檻欲投綸戍樓烽熄函金鑰龍塞風清掩
玉關常願時安不負此儘容樗散自開顏

殫忠樓

孫承宗

縹緲憑高百尺頭籌邊何暇坐銷憂目窮紅樹家千
里笛倚風檐月一鉤藻井幕天開雁陣鬢雲結市失
龍湫白山黑水檉楹外玉帳蕭蕭萬壘秋

出義院口看屯

范志完

四月青葱八月黃邊城内外舉霞鵬逢人莫問河邊

骨且喜今朝稻滿筐

幕客云日為驚蟄節懷然有作 孫承宗

誰負旋乾手當春起蟄蟲魚龍驚寂寞天地喜昭融
墜戶身方遠昂霄意已雄俗孽誰與破予欲問靈靈

春日觀兵瀚海

范志完

閱武傍關城揮戈鐵馬鳴風雲驚叱咤霹靂震喧聲
赤電空中起環烟上呈邊烽何日靖銀漢洗天兵

餅花

孫承宗

高牙風峭戟枝寒杏蕊新香春未闌却憶韋家花樹
會關城初向一餅看

懸陽洞

朱洪範

僻關偏雅趣石洞隱山阿萬草叢生合群峰壁立多
蹟稀迷小徑夕照渺崇坡欵欵朝天竅層層闢俗窩
造茲新大士稱彼舊彌陀邊臣欣勝集遊子樂風和
劇飲忘歸去高懷發浩歌一經題品處萬古偕山河

重九登角山遇雨

劉鴻儒

振腕登高菊正翻翠微深處緝宮依歲荒山寂遊人
少秋老邊寒過鴈稀開代戰場眼底濶舊時烽塞嶺
頭巍歡酬莫瑛情何極妬雨催歸恨落暉

和劉都諫韻

呂鳴章

山海圖志卷之九
四十五
嫋嫋翠微菊弄醅梯雲尋勝步同依貝甍清映遊絲
淨衲榻幽閒俗客稀眼底洪濤晴愈森巖頭密霧雨
添魏會心似有山靈助潦倒莫樽任落暉

長城知聖樓

陳天植

長城萬里海天悠懷古登臨醉倚樓當日祖龍空築
怨不知遺恨幾千秋

澄海樓

即知聖樓係觀海亭改建

周體觀

相龍鞭石神蛟怒喝旗橫洋傾北注九點煙州天盡
頭丸泥封隘不封愁踏斷秦城迴鴈影戍樓直取滄
溟枕馮夷起舞閭風寒誰伐鼉鼓沸狂瀾折蘆欲凌
碧波去自恨凡骨沉於石檣可楫兮松可舟員嶠如
何不可遊邈邈余懷望仙子東拜貞娘能不死借問
隴西李細眉一泓水瀉幽夢時而今白玉樓中看俯
身下視見不見

前題

陳丹

長城萬里跨龍頭縱目凭高更上樓地近蓬壺仙作
主杯傾海屋酒添籌大風吹日雲奔合巨浪排空雪
怒浮借得雄濤澆磊塊又看新月上銀鈎

前題

朱國梓

戍樓盡處接危樓一鑑凌空萬象收雲水迷離潮汐

古滄桑泡幻見聞悠平時遊覽多忘曉今日相逢怕
遇秋破浪乘風有舟楫安能歌笑不持甌

前題

尤侗

茫乎望洋向若嘆大哉歸墟渺無岸近視爭看白馬
奔遠觀不辨青霓斷似雷非雷聲殷殷魚鱉顛倒騰
千軍駭浪乍浮出地日驚潮翻射垂天雲方丈蓬瀛
疑咫尺漢武秦皇心欲死鮫室蜃樓有若無瑤臺瓊
闕非耶是飄飄我亦凌雲遊海風吹搖城上樓援琴
為奏水僊操鼓權不見漁翁舟東望獨存姜女墓精
衛填成血淚注縱使銀濤萬丈高不到墳頭草青處

西行更上海神祠羅襪凌波來幾時霧髻烟鬟光窈
窕夜深鼉鼓舞馮夷土人指點先朝事十年前風
景異關上皆屯細柳營牆邊亂蹴桃花騎水犀之師
蔽艫餘木牛之糧啣舳艫鐵甲將軍吹威栗臙脂小
婦醉醅酥只今眼中一事無寒沙蕭蕭鴈飛疾仰頭
屹峙長城孤惟有滄海依依在滄海尚變桑田枯而
我感嘆何為乎

前題

陳天植

天風日夜吼萬里雄濤漾元氣接青冥夕陽歸島上
蓬萊弱水隔倚檻遙相望何處覓神仙孤懷獨惆悵

愛此百尺樓滌我塵中况徘徊未能去薄醉松花釀

前題

錢裕國

橫秋爽氣水波明蕩漾遙涵逼太清月照魏峨山作
鎮雲連浩淼海為城沙漚俯瞰十洲小杯酒登臨一
葉輕自昔金湯稱險塹且憑談笑坐蓬瀛

前題

余一元

海樓高聳勢魏峨暇日登臨樂事多巨浪無心含島
嶼洪濤有意納江河陰晴變處情形異晝夜分時景
色和此去蓬萊應不遠長空一望盡烟波

前題

張瑞揚

海樓一望淼無涯飛浪奔濤捲雪花聲憺桑田欄外
變勢推蓬島日邊斜蛟宮夜濯七襄錦蜃閣晴開五
色霞咫尺斗牛如可到願從博望借仙槎

前題

王簡

行行緩轡謾逶迤極目空溟氣象多浪轉風迴迷泰
岱潮平日午露靄翳欲隨庾亮樓中興誰挽張騫海
上過草野臣民歌 聖主萬年寧靜不揚波

觀海亭望秦皇島

陳天植

孤亭百尺接微茫秋日高登神易傷古堞連雲橫大
麓雄濤飛雪濺危檣秦皇漫設籌邊計徐福空譚採

藥方自昔興亡渾莫問一聲長嘯寄予狂

箭筈山

陳名遠

箭筈峰高朔氣橫松楸謾謾晚颺鳴雲中遙度征鴻
影沙際寒嘶牧馬聲海波光浮島嶼薊門秋色擁
關城蒼茫一望寬銷盡廢壘猶傳漢將營

山莊秋興

馮祥聘

皎月照新秋浮雲過眼流樽前山色翠雨後水聲悠
靜坐思三省忙中遣四愁詩魔降不住忽上五更頭

晚登古長城戍樓

陳天植

薄暮高登古戍樓長城雄峙海東頭燕山冷照秦時

月榆嶺遙傳白帝秋浪說終軍能款塞獨憐李廣不
封侯當年誰設安邊計萬里雲寒似築愁

登角山憶昔偶作

陳廷謨

角山幾度展邊籌憑弔長城千萬秋昨歲欽工方
得濟疇疇猶帶五更愁

觀南海口

劉鴻儒

汪洋一派碧天低何事潮能不穩栖喧吼波中橫紫
塞風雲靜裏對青齊曉光登眺俗襟洗曛暮塵遮彼
岸迷久擬仙槎從性適食霞高友願相攜

和劉都諫韻

呂鳴章

晴波萬里海雲低水碧沙明鷗鳥栖潮打石城聲若
咽煙連曉霧色爭齊浪花雪滾紋生幻帆影星搖望
欲迷庾興南樓良不淺愧余杖履未追攜

望海

陳天植

上方高極目海氣薄晴空萬里生寒浪千山咽朔風
馬驅沙磧裏鳥度夕陽中幾歷滄桑變堪嗟是塞翁

謁天妃廟

陳廷謨

嬰兒謁廟五更天一盞琉璃照海船拜罷天妃樓上
立紅羅裹擲飯僧錢

關門秋夜

韓雄胤

靜夜蟪蛄響新涼蟋蟀吟三山歸遠夢一葉助慈心
月色淒團扇霜華冷素杵幽人家落意不待九秋深

同遊北園

馮祥聘

北園花艷集嘉賢髣髴蘭亭勝事傳嬰語管絃天半
落揮毫共欲吐雲煙

題漢飛將軍射虎石

陳天植

猿臂將軍勇絕倫提戈萬里淨煙塵至今渝水沙邊
石猶畏當年射虎人

浴溫泉寺

陳廷謨

禪窟新從仙竈分玉房丹液尚氤氳客情去後知何

似都化泉亭一片雲

午日登朝陽洞

余一元

野興久不發隨衆一高登病軀怯攀躋凭僕須漸乘
群公業蚤集待我事儼承蓮宮瞻禮畢古洞羅烹蒸
飽食轉西廊列嶂積峻嶒芳樹環巨石臺砌揖同升
艾葉採斜擗蒲觴酌互騰樂奏邊城曲情聯道義朋
醉翁非為酒昌黎豈奉僧歡娛盡此日世事究何憑

重九登角山

陳丹

攬勝登高九日秋茱萸香泛興偏適雙峰插髻青螺
現萬壑亭松翠蓋浮飛將有靈俵蚤遁封姨多事帽

難留幾回徙倚巉巖上海外三山一望收

重九登角山陪陳比部

劉允元

十年不到角山遊今我來遊重九秋門下青松歌翠
岫路傍紅葉點丹丘新禾釀酒菊花味舊契投歡梅
雪謳攬勝追隨能幾許浮沉滄海任東流

石河弔古

陳廷謨

二十年前戰馬來石河兩岸鼓如雷至今沙上留殘
血夜夜青燐照綠苔

登首山

余一元

鬱懷歷久未登山晴日同遊開笑顏列嶂參差烟霧

灑一川環繞水雲閒
魏魏神宇層臺上
翼翼孤亭落照間
綠樹覆陰花放蕊
暮看黎首荷鋤還

又

林下生涯借勝遊
雲山渺渺水悠悠
南瞻大海波濤湧
北顧群峯蒼翠浮
芻牧牛羊遵隴陌
耦耘禾黍徧田疇
臨風把酒陶然醉
策蹇歸來似汎舟

前題

陳丹

重陽過半又登高大將
開筵擁節旄
山嶂海嶂當停午
湧銀濤採花共泛杯中菊
剖蟬爭持醉後螯
傳道荒陬多虎豹
暮歸共欲控弓刀

貞女祠

陳天植

迢迢長城路
纖纖弱女身
不憚萬餘里
尋夫遼海濱
夫婿從征役
勞勞多苦辛
耐此霜雪威
白骨委黃塵
寒衣剛送到
不見廢虜人
對茲築愁者
翻令蛾眉嚬
登高遙悵望
水石空粼粼
可憐妾薄命
哀怨難俱陳
夫魂不可招
泪血傾城闈
婦心金石堅
此生聊以殉
長城役方罷
二世已亡秦
至今千載下
貞女祠猶新
東海有滄桑
斯墳無沉淪
偶來憑弔生
悲歌當蘩蘋

吊趙烈女墳

傅光宅

一塚青山下
經過感慨深
家貧依草莽
塞遠對荒林

正氣來天地芳名自古今
崔嵬一片石千載見貞心
和韻
朱國梓

殘碣列貞蹟和詩敬服深
生為靖處子死表丈夫林
不學何須問古維自範今
九關石一片不轉萬年心
和韻
呂鳴章

孤貞一片石憑吊引悲深
潔骨凌霜色丹精化碧林
殺身逼視古正氣軼無今
斷臂堪同烈哀哉趙女心
和韻
李集鳳

不獨姜墳古聞風感倍深
冰操一處子霜烈入寒林
英爽渾如昨馨香直到今
年年片石下夜月對孤心

角山登眺

陳廷謨

日出渾疑吐海熬沙邊
春浪湧洪濤倚闌遙向東南
望雉堞氣氳百尺高

遊蟠桃寺

劉允元

入口觀不盡登臨趣尚多
蒼松環寺立溪水繞村過
月濶聽山靜林深思鳥歌
濤聲疑海上春雪壓岩莎

洞山

劉澤澍

半壁青峰插碧旻
紆迴石磴隔凡塵
巨波沆瀣平如掌
深窟峻嶒險似脣
法像雕椽舞鳳燕
賢侯高塚卧麒麟
眼前即是桃源徑
誰向漁郎就問津

山海關誌卷之九終

山海關誌卷之十

備述誌

風土所宜市廛所聚王政所究心焉表賢人之墓以防樵採存二氏之宇以助儒修至於觸景會心一草一木一泉一石皆足資冥悟供幽賞而景致特以撮其大畧云爾誌備述

土產

土石類

白鹽 土粉 紅土 石灰 石炭 赭石 皮硝

穀類

杭黍 稷 粟 梁 豆 稗 菊秫 大麥
芝蔴 蕎麥 小麥

木類

松 栢 檜 槐 柳 椿 榆 桑 柘 檟
青楊

果類

梨 桃 杏 李 棗 栗 榛 菱 蓮 來禽
藕 花紅 櫻桃 石榴 葡萄 藤棗 核桃
郁李 羊棗

蔬類

韭 蒜 苜 薺 薺 葱 茄 芥 蕨 蕪 赤根

瓠 蘿蔔 芡 芡 萹 苣 白菜 芹菜 藤蒿

胡蘆 花椒 蒲葍 胡蘿蔔 水蘿蔔

瓜類

冬瓜 西瓜 王瓜 絲瓜 菜瓜 甜瓜 香瓜

藥類

桔梗 蒼朮 黃芩 遠志 黃精 防風 柴胡

紫蘇 荊芥 知母 升麻 麻黃 菊花 草烏

細辛 葛根 苦參 藁本 瓜婁 葶歷 兔絲

瞿麥 前胡 茯苓 朴硝 山查 麝香 牡礪

海蛤 草麻 南星 黃栢 大黃 地黃 蒼耳
百合 五味子 威靈仙 桑白皮 益母草

馬兜鈴 赤芍藥 金銀花 地骨皮 金精石

小茴香 白蒺藜 薏苡仁 郁李仁

花類

芍藥 山丹 萱草 丁香 匾竹 鳳仙 薔薇

茨梅 石竹 金盞 月季 玉簪 鷄冠 珍珠

蜀葵 嬰粟 葵 菊 榴 蓮 滿條紅 轉枝

蓮 落金錢

羽類

鷄 鶩 鶯 鴨 燕 雉 鵲 鳩 雀 鴈

鳧 鶴 鷹 鵠 鴿 鸛 鷓 鶻 鷓 鷓

畫眉 鷓鴣 青鵠 鷺鷥 鴛鴦 鸛鶻 布谷

水鴨 天鵝 烏鴉 銅嘴 鐵腳雀 黃鸝

毛類

馬 虎 牛 鹿 猪 獐 羊 驢 麋 騾

熊 豹 狐 狸 狼 麂 猴 野猪 山羊

兔

鱗介類

鯉 鯽 鯢 鱖 鮫 鰻 鮪 青魚 鱧 石首

鮫石 鯨 白眼 白條 魯子 海胎 對蝦
海蟬 蠣房 蛤蜊 蚌 蛭 鼈 龜 海鶴 鶉
海饅頭

蟲類

蠶 蝶 蟬 蜂 蛇 蝎 蟻 鼠 蟋蟀
蜻蛉 蜘蛛 螳螂 蝙蝠 蟋蟀 尺蠖 鼠婦

雜植類

木綿 藍 蒙麻 線麻 楸麻

元按土產據舊誌所載有常產有間生弗為典要
即如魚鳥之微海胎鐵脚關門美味也海胎出於

夏至秋而肥鐵脚見於冬至春而隱然或蚤或遲
或多或寡按誌而求之鮮有能愜其願者矣

集市

一六日期集在東羅城
二七日期集在南街
三八日期集在西街
四九日期集在北街
逢五逢十日期集在西羅城

元按此集期在城者則然石門海陽四十里之外
俱係撫寧關誌之所不載矣然市井之間隱曲之

地往往有開場賭博者愚幼子弟一為所誘輒狼
狽不振夫賭者盜之階也小盜考大盜之漸也
當事者欲弭盜先禁賭不可不留意焉

丘墓

明巡按陝西監察御史前翰林院庶吉士鄭公已墓

在西北山麓
離城八里許

明進階朝列大夫福建按察司僉事前兵科給事中

蕭公顯墓 在北門外角山之陽離城五里

明兵部左侍郎食從一品俸贈工部尚書詹公榮墓

在南門外長城
右畔離城六里

明陝西行太僕寺少卿劉公復禮墓 在西北離城三
里許

明陝西秦安縣知縣蕭公大謙墓 在北門外角山之
陽離城五里僉憲

公瑩
側

明遼東廣寧道兵備叅議馮公時泰墓 在西門外丁
武寨離城十

里
許

明贈中議大夫大理寺左少卿劉公思誠墓 在北門
外角山

之陽離
城三里

明朝議大夫尚寶司卿程公繼賢墓 在西北離城
三里許

明雲南廣南府知府詹公廷墓 在長城右畔離城
六里尚書公瑩側

明掛鎮朔將軍印薊州總兵官劉公淵墓 在紅瓦店
離城十里

明驃騎將軍後軍都督府都督僉事南部副總兵官

呂公鳴咸墓 在北門外角山之麓離城六里

明榮祿大夫左軍都督府都督同知 遼東 鎮總

兵官王公廷臣墓 在南門外離城七里許

皇清誥贈大中大夫光祿寺卿呂公鳴夏墓 在北門外角山之麓離城六里

之麓離城六里

皇清誥贈朝議大夫禮部儀制清吏司郎中加從四

品余公崇貴墓 在城西北尖山之上離城八里許

皇清誥贈中憲大夫山西汾州府知府加一級劉公

愼墓 在西北離城三里許罔卿公塋側

元按誌有載丘墓之例非表其貴表其賢耳然有

不勝載者焉至於都督王公 非本

境人但墓在境內未可遺也

寺觀

崇興寺 在西羅城

棲霞寺 又名棲賢在角山巔先達蕭公顯詹公 併

團雲寺 近年程君觀願俱讀書其 城西北十五里

圓明寺 城西北二十五里

蟠桃寺

城西北三十里先達馮公時泰劉公復禮讀書其中

後角山寺

三道關西

溫泉寺

城西三十五里有溫泉因

廣嗣庵

西關廂外祀白衣觀音

五泉庵

城西北十五里中有五泉因名

女貞庵

城內東北隅

觀音閣

北甕城內

三清觀

在西羅城北門外

普濟庵

在鎮城西門外

地藏寺

一在北門外一在西羅城

文殊庵

一在石河西一在歡喜嶺

慈愍庵

在鎮城西街

元按二氏設有專司於以約束門徒祈禳水旱亦不可廢邇來其教寢盛細民之家屠販之流一遇喪葬必作三晝夜道場放砲揚幡震動閭里誨諂滋惑褻僭殊甚昔賢常禁之斯亦不可不杜其弊也

景致

懸洞窺天

三道關右崕半有石如人二孔直通天

孟內可容數十仙字不知何時

所鑄

瑞蓮捧日角山頂將曉遙望海中日出紅雲四擁恍如蓮座日升則座沉矣

山寺雨晴角山寺雲霧聚不散時必半山間大雨其上晴明若別為一景

海亭風靜亭構海口最高處海風孔四揚沙獨亭中閒淨莫覺今更建為樓

姜墳雁陣姜女墳四週皆水微露頂面冬水稍涸又米滑不可登惟飛雁翔集其上

秦島漁歌島於立夏後掉舟捕魚一時聚小艇數十逐隊上下隨波中沒晚歸漁歌互答陶然

屏峰春盎有寺宇可供臨眺馬群峰四面如列屏障至春深日麗紫翠交映景物不容盡狀名曰圍春

石溜冬溫山者以此去平山營北水自石隙中流出雖隆冬猶溫可浴

茶盤積雪茶盤山高冠諸山上有古刹仙跡陰崖積雪歷夏不消

桃峪停雲蟠桃峪三面皆山禪院清幽園林葱鬱雲行其間為之停留不去云

元按關門山川之勝景物何勝紀載但年來多虎患遊攬之興為之索然石門文遊府與明手刺一

虎蒲河寧都閩忠懷前後力戕二虎關門滿洲諸公城北射殺一虎城西射殺一虎近患少息藹苑

雉兔庶幾可優游於樂郊矣

山海關誌卷之十終

山海關誌卷之十終

山海關誌卷之十終

山海關誌卷之十終

山海關誌卷之十終

山海關誌卷之十終

山海關誌卷之十終

四

朝藏書印

上海圖書館藏

